



Kamis, 05 Agustus 2021

Ogen: Ezekiel 11:14-21



KUAGUI PUSUH SI PIHER



Enggo piga tahun kita jadi kalak Kristen? Enggo nge kita jadi kalak Kristen si patuh, si tahu-tuhu mereken pusuhta guna ipelimbarui Tuhan? Bangsa Israel eme bangsa si mekeng ras pusuhna pe enggo piher desken batu. Pusuh ras perukurena enggo tercemar seh makana jadi piher janah lanai patuh man Tuhan. Imelketi bangsa e kegeluhenna alu nembah berhala. Maka Tuhan erpadan guna ngagui pusuh si piher bagi batu janah mereken pusuh si mbaru ras perukuren si mbaru man bangsa e. Gelah alu bage, maka bangsa e nggo banci mulihi patuh man peraturen-peraturen Tuhan ras alu tutus ndalanken perintahNa. Bali bagi kita, adina lenga kin lit pusuh ras perukuren si mbaru, mesera kita banci patuh man Tuhan. Kita pe pasti nge lalap menuntut ras nimbak kata Tuhan. Adi Jokowi ngatakensa bangsa Indonesia perlu 'revolusi mental', maka kita sebagai kalak sierkiniteken perlu revolusi pusuh ras perukurenta. Perubahen pusuh adalah start (Km 0) guna banci kegeluhenta bagi singena ateNa. Enggo nge kita masuk ku bas start, berangkat i bas titik Km 0 guna ercakup-cakup ras Tuhan janah ngelakoken perubahen ras pembaharuan? Tujun Tuhan ngagui pusuh si piher ras mereken pusuh si mbaru, guna menetralsir kerina racun rohani si lit bas pusuhta. Pusuh ras perukuren si mbaru eme pusuh si patuh ndalanken perintah Tuhan ras ngataken lang nandangi dosa. pusuh ras perukuren si mbaru eme pusuh ras perukuren si tetap rasa lalap tertuju man Tuhan ras metedeh lalap muji Tuhan.

✎ Pusuh si ipelimbaru Tuhan eme pusuh si nggit patuh